

豫

章

焚

書

第五五册





廬山紀事卷七

廣陵 桑喬 子木

五老峰東南至羅漢嶺

白鹿洞書院

五老峰坡陀南下如頓萬馬忽突起一山而四山環之是爲後屏山其下有白鹿洞書院

洞志山疏白鹿洞者唐李渤讀書處也初貞元中

渤與其兄涉俱隱廬山而渤養一白鹿甚馴行嘗以之自隨人因稱爲白鹿先生而謂其所居曰白鹿洞寶曆中渤爲江州刺史卽所隱地創臺榭以

張其事而鹿洞遂盛聞於人矣其後唐末兵亂郡縣學校廢壞高雅之士往往讀書講藝其中南唐昇元中遂建爲學置田聚徒以國子監九經李善道爲洞主名曰廬山國學四方之士受業而歸出爲世用名績彰顯者甚衆宋初因置爲書院益擴而大之與睢陽石鼓嶽麓三書院並名於天下當是時學徒常數十百人太平興國丁丑從知江州周述請賜國子監印本九經驛送至洞後又官其洞主明起爲褒信縣簿歲壬午始置南康軍并學而洞乃屬南康咸平壬寅猶詔有司脩繕然自有

南康軍學而洞事浸浸廢矣祥符初直史館孫冕
以年及乞致仕願得白鹿洞故趾歸老詔許之歸
未至洞而卒祥符中冕子比部郎中琛卽洞旁築
室十數楹榜曰白鹿洞書堂俾子弟講習四方有
來學者輒餽食之以此著聞於時當塗郭祥正爲
記勒石其後兵亂室焚記石徙天慶觀其後天慶
觀亦焚記石遂燬不存淳熙己亥朱晦翁來守南
康甫至卽檄教授楊大法司戶毛某看詳旣又躬
至鹿洞周覽之悉得其可修舉狀因具上尙書省
言鹿洞乃昔賢嘉遯之地先朝嘗卽以養士德意

甚厚而一廢遂不復振爲吏者不得不任其責且所建立僅小屋十數楹纔足不泯設計亦不至勞費請檢會太平興國中節奉指揮送本軍爲法守不使至湮沒其後又劄上尙書并丞相言願得比祠官例爲白鹿洞主假之稍廩使得終與諸生講習其中猶愈於崇奉異教香火無事而食也其後又具疏請依嶽麓書院例賜白鹿洞書院額并給賜高宗御書石經及九經疏論語孟子等書皆格不行當是時朝野詢詢傳以爲怪其後晦翁遷浙東提舉入奏對延和殿具言白鹿洞書院太宗真

宗造士之意甚深非下吏淺識所可窺測今老佛之官布滿天下大都逾百小邑亦不下數十而公私增益勢猶未已至於學校則一郡一邑僅置一區附郭之縣又不復有盛衰多寡相懸如此有司者不彼之正而反疑臣之請何也夫無御額賜書爲流俗所輕廢壞無日非陛下所以丕揚前烈嘉惠斯文之盛心也臣謹昧死請於是孝宗始允可之元末兵燬至我明正統中南康守翟溥福乃始得其遺趾於榛莽中而振起之書院由是復興其後御史陳銓提學僉事李齡副使蘇葵邵寶蔡清

李夢陽知府劉定昌等咸先後維持之虞集胡儼
彭時李賢張元楨李齡何喬新皆有記

商丘漫語唐時人士多棲隱山谷以獵聲華故司
馬子微目終南爲仕宦捷徑不獨廬山當貞元元
和中符楊輩居廬山者三數十人不獨渤兄弟但
他仕者所治不近所隱無以彰顯之故隱居汨沒
無聞白樂天赴杭州過草堂纔信宿卽去獨渤刺
江州爲能侈而大之此鹿洞所以聞於世也

書院有禮聖殿

洞志初朱文公爲浙東提舉時以錢三十萬屬南

康軍守錢聞詩建禮聖殿後廢我皇明正統中翟溥福重建易名大成弘治中蘇葵再建復名禮聖

晦翁跪坐拜說初錢聞詩作禮殿時朱晦翁移書

言宜如開元禮於祭時設主不爲塑像不從又言像用燕居服鑿石爲臺席地而坐免匍匐就食之譏亦不從其後晦翁作跪坐拜說寄鹿洞諸生大略言古者坐與跪類儀禮曰坐取爵禮記曰坐而遷之曰一坐再至曰武坐致右軒左老子曰坐進此道漢文帝不覺膝之前於席管寧坐不箕股榻當膝處皆穿諸所謂坐皆跪也然記又云授坐不

立莊子云跪坐而進人蓋以膝隱地伸腰及股危
軀而不安者跪也以膝隱地以尻著蹠而體便安
者坐也此跪與坐之異也詩曰不遑啟居釋之者
曰啟者跪也爾雅曰妥者安也釋之者曰安定之
坐也夫起爲跪則居爲坐矣妥爲安坐則跪爲危
坐矣又大祝九拜杜子春釋奇拜曰拜之時先屈
一膝今之雅拜也夫以先屈一膝爲雅拜則餘拜
皆並屈兩膝明矣肅拜者拱兩手而下之至於地
也頓首者頓其首於手上也稽首者却其兩手而
以首至地也皆因跪而益致其恭也今成都郡學

所存漢文翁禮殿刻石諸像皆膝地危坐兩蹠隱然見於坐後帷裳之下尤足證云

明倫堂

洞志明倫堂在禮聖殿東翟溥福建蘇葵重建有邵寶正學之門并某敕賜白鹿洞書院二扁又南有石華表扁曰山水輝光**石**文公東黃商伯帖二石刻嵌堂壁

宗儒祠

洞志宗儒祠卽三賢祠初文公既去郡諸生爲立生祠於講堂右文公聞移書撤之及文公卒開禧

乙亥諸生復繪濂溪二程及文公像祀於講堂後
廢我皇明翟溥福別立祠祀濂溪文公李賓客於
殿左配以陶淵明劉凝之陳了翁劉道源名三賢
祠其後蘇葵又遷五賢於別室而專祀周朱邵寶
又配以從朱子講學鹿洞之十四賢趙淵又并祀
象山易名宗儒石劄王守仁大學中庸古本在祠
東壁湛若水海濶天空四字在祠西壁

先賢祠

洞志先賢祠在文會堂前以祀李博士涉李賓客
渤李洞主善道朱助教弼明洞主起劉洞師元亨

劉西澗渙劉秘書恕陳司諫權李提學齡胡洞主
居仁蘇提學葵邵提學寶蔡提學清陳御史銓唐
御史龍共十六人

祠後有井李夢陽鑿且自爲銘今堙

忠節祠

山疏祠以祀諸葛忠武侯陶靖節在宗儒祠南春
秋則合祀於先賢祠序於李博士上

文會堂

洞志文會堂在明倫堂左嘉定間朱寺正建陳寺
丞改今名紹定中知軍史文卿改名君子堂後廢

我皇明翟溥福蘇葵重建石劄湛若水四勿箴心

性圖說

白鹿洞

洞志初鹿洞有名無洞正德初南康守王濬乃闢後山爲洞曰白鹿洞臺於洞上曰思賢臺其後南康守何濬鑿石爲鹿寘諸洞中嘉靖中巡按御史曹忭亭於臺上曰思賢亭自爲記**石劄**先賢書院白鹿勝洞景賢臺思賢臺並李時達書白鹿洞天何遷書思賢臺劉世揚書理學淵源衡厓書俱在臺畔

田疏往者李渤鹿洞今不知其處或曰卽鹿眠場也夫鹿眠場何可以洞言地近矣而不似李夢陽曰在三疊泉壑中乃今人所謂石門關劉世揚所謂玉川門者洞似矣而不近唐龍大意亭記則曰鹿洞堙矣三者概之未有得也蓋陳舜俞廬山記曰唐李渤與兄涉借隱白鹿洞後爲江州刺史迺卽洞築臺環以流水雜植花木爲一時之勝夫舜俞去唐不遠五代宋初相沿遺跡具存猶可考見旣曰隱居鹿洞又曰卽洞築臺則今書院卽隱居之趾亦卽鹿洞所在而鹿眠場卽鹿所常眠處也

三疊泉壑中既無築臺遺蹟陳舜俞又未嘗言朱
晦翁經營鹿洞時往來三疊泉壑中亦不言鹿洞
在彼則亦何據而云然哉且三疊泉壑去書院十
里而遙窮山邃谷人迹罕至渤又處士聲勢不能
及遠蓄鹿於彼大非人情凡考古者欲其實若前
無所稽徒爲高論是自我作古而古蹟不必憑也
搢紳大夫一言而天下後世將藉以爲口實可易
易哉或曰然則何以謂之洞曰廬山如僊居洞蓮
花洞皆無洞祇以四山迴合似洞而名鹿洞亦其

類耳

朋來亭

山疏在思賢臺北山絕頂提學副使王宗沐建

宗

沐詩孤亭縹緲四無鄰全占匡廬望裏春俯仰

坤須著此主張風月更何人洗心賴境終非靜

俗耽山亦是塵未喪斯文吾黨在莫教虛度電光

身參議孫應鰲坐朋來亭有懷敬所喬嶽高人兩

並名文章相對有餘清每緣休暇耽幽賞得向巉

巖結靜盟歌罷雅音真寡和夢殘天籟自相鳴十

年愧殺奔忙客何事金丹不可成

有水自凌雲來逕書院東流出硤爲貫道溪

廬山紀事卷七
九
山疏貫道溪者犀牛折桂之水也貫道僑今廢

書院之西有釣臺石釣臺亭

山疏釣臺石在貫道溪北石劉文公釣臺二大字

劉世揚意不在魚四字在釣臺石上

釣臺亭李夢陽建自爲記并書碑石劉太原喬宇

五老峰三大篆字在碑陰

又西有漱石

洞志漱石在釣臺石西溪水湍激處石劉文公漱

石二大字在漱石上彭治尋樂處三字在漱石傍

書院之前有卓爾山其巔有高美亭

洞志卓爾山在貫道溪南提學副使鄭廷鵠爲之名高美亭在卓爾山巔嘉靖中御史徐岱建

山巔舊有光風霽月亭後移於風雩石北岸今廢卓爾山西有大意亭

洞志大意亭在高美亭西正德辛巳御史唐龍建自爲記

洞志大意亭西舊有白鹿精舍今廢**石**文行忠信四大字字徑數尺文公書陳綽摹刻在精舍北澗石上聽泉二字在文行忠信石上觀德二字在文行忠信石南崖與廢射圃對俱文公書

風雩二字在觀德石東洞志其地故有亭晦翁嘗
與諸生列坐其上後李山長取亭傍風雩二字名
之今廢石劖隱處二字在風雩石上流杯二字在
風雩石下文公書

大意亭西南有鹿眠場白鹿所嘗眠處也

石劖李夢陽鹿洞二大字

流杯石東有洗心橋

石劖砥柱二字李夢陽書在橋東溪石上觀瀾二
字彭治書在砥柱南

又東有勘書臺亭於其上曰獨對亭

山疏 勘書臺 宋李萬卷 勘書處也 崖石峻峭 下臨
湍澗 萬卷不知其名 **南康志** 李萬卷 宋元祐間 讀
書 白雲菴 仕至丞相 卒葬白鹿洞 側然 宋史不載
其人墓亦不知所在

獨對亭在勘書臺上 弘治中 邵寶建 并書扁 自爲
記 李夢陽爲銘

又上有好我亭

山疏 嘉靖中都御史何遷建

臺西有泉曰聖澤泉

洞志 風泉雲壑樓 卽宗文閣 李山長建在勘書臺

西今廢石劖風泉雲壑四字陳淳祖書在勘書臺
下題志慶元丙辰之臘月太守廣陵趙公修白鹿
書院十有六日知縣事梁翊以督役至此教授吳
中堂長吳堯佐學錄余坦直學趙規

洞志聖澤泉在風泉雲壑字下石劖聖澤之泉四
字

臺東有小三峽峽口有枕流橋

洞志貫道溪流與書院左小水合而出峽飛湍陡
絕號稱小三峽

枕流橋在峽口峽口之石富有先賢遺跡宛宛可

讀峽壁有朱文公敕白鹿洞書院六大字溪石有
朱文公枕流二大字橋南題志永嘉陳淳祖假守
是邦被命造朝以書考日謁辭鹿洞會講預者元
寮於丘瓊山林棟堂長陶桂一洞正與仁前
洞正主祠學錄張傳一講書劉陶應子黃有
開堂書杜端甫直學傅仕龍歐陽綱學諭與諸生
幾百人景定庚申良月旦日題

洞志枕流亭今廢明泚題志番陽李侯駿嘉定戊
辰歸自武昌訪書院經小三峽愛清泉之奔流懸
崖之對峙出橐貲與白鹿洞諸生翔亭峽上後十

年戊寅郡人胡泳以三山黃公幹所留郡守陳宓
復鼎新崇大之扁以枕流亦莫揆首勗之由也又
四年壬午李侯守池陽泳客於池昉聞其始末是
秋侯之子仁廣甥夏昌宇昌辰實來合洞之士友
七十有八人舉酒亭上相與歎歲月之易流幸來
者之有繼也因書其事刻真崖石七月壬申胡泳
題

洞志百花亭亦李萬卷建與枕流亭隔溪相對今
廢自潔亭在洞口今廢舊有自潔二字陳宓題志
朱文公嘗書此以名洞溪今逸其蹟嘉定乙卯蕭

田陳宓謹書又自潔二字陳宓書在題志側鹿洞
二字朱子書蹲鹿坡方豪書俱在自潔字側

枕流橋北為迴流山亭於山巔曰六合亭

山疏小三峽水過枕流橋北溪石齒齒激水又南
有小溪來會之水溢湍怒洶洶有聲流一里所有
山雄雄當水所行道溪流觸之遂折而南故名其
山曰迴流

洞志六合亭在迴流山巔正德辛未南康守劉章
建李夢陽為記

迴流山下有石華表扁曰前脩逸蹟今日名教樂

地

山東有流芳橋

洞志流芳橋亦名濯纓橋在石華表東石劓陳宓
流芳二大字在橋北陳宓題志新安朱侯在郡時
建橋白鹿洞之東南陬面直五老溪流紺潔未之
名同遊江西張琚羅思姚鹿卿閩張紹燕潘柄郡
人李燔胡泳繆惟一會講洞學畢相與歌文公之
賦特名流芳旣揭楣間因紀岸左嘉定戊寅四月
丙午莆陽陳宓書

又東有溪口橋益東五里所有白鹿原石橋

洞志 溪口橋在迴流山東二里許俗呼觀音橋其
北有石華表知縣崔孜建李夢陽扁曰白鹿洞書
院

中館舖在溪口橋南

洞志 白鹿原石橋去書院五里許在羅漢嶺下東
通驛道西入書院

朱晦翁書康節誠子孫文後跋伊川與方道輔帖
跋和靖帖跋包孝肅詩並燬

其廩土有洞田散在星子及他縣凡二十七頃六十
八畝有奇

洞志初南唐建學時嘗置洞田以給士然其事不可攷洎熙庚子朱晦翁迺始置谷源臥龍等莊及旁邑没入田共八百七十畝後三年癸卯軍守朱端章以浮屠詭名没入田七百畝益洞田後三十八年嘉定辛巳軍守黃桂以没入田三百畝置西源莊咸淳間劉傳漢又增置貢士莊元大德間崔翼之又增置上田百畝元末兵亂田皆迷棄亡矣我皇明成化中提學副使李齡迺復置洞田一百五畝有奇與僉事徐懷所置田八十畝有奇租入少不足以廩士士多辭去其後巡按御史陳銓益

市田八百二十畝有奇而提學副使蘇葵又市田
六百一十七畝有奇邵寶所置田二十六畝有奇
唐錦徐一鳴所置田五十二畝有奇參政張元冲
所置田一百一十六畝有奇御史蕭端蒙所置田
六十六畝有奇而提學副使李夢陽鄭廷鵠知府
陳霖推官徐進又先後所清出田一百六十二畝
有奇并他山地塘共二千三百九十八畝有奇嘉
靖乙卯江西饒潘永豐王府輔國將軍厚燠輸田
二百九十二畝又江藩瑞昌王府奉國將軍拱樞
輸田七十八畝六分皆以供祀事贍學徒焉

山疏昔崇陽令趙彥繩取僧田二百畝入於學官
曰使無父無君者不得獨飽學為忠孝者得無所
營而益修其業朱晦翁稱其務一得兩然彼適有
幾可乘今洞田雖多取之僧皆重直以酬與取於
民無異是以民視異端而不為徒取也可謂義盡
仁至矣

其造士有洞規

朱子白鹿洞規父子有親君臣有義夫婦有別長

幼有序朋友有信

右五教之目

博學之審問之慎思之

明辨之篤行之

右為學之序

言忠信行篤敬懲忿窒慾

遷善改過右修身之要正其誼不謀其利明其道不計

其功右處事之要已所不欲勿施於人行有未得反求

諸已右接物之要

蔡宗究洞規說洞規欲學者易見故條列以示非

外五倫別有接處亦非外博學五者而別有功也

然五者之要在心朱子曰古聖賢皆以心地為本

鹿洞諸賢隱居二人唐李涉李渤

李涉字清之號玉谿子有詩名**文獻通攷**涉雖與

弟渤共隱廬山然嫌人早從陳許辟元和中為太

子通事舍人投匭言吐突承璀冤狀時孔戣知匭

事見副章結責不受涉乃行貨詣光順門自通進
歿上疏極言涉姦險罔上請加顯戮遂出爲峽州
司倉參軍太和中爲太學博士後以武昭事流康
州語涉嘗江行至皖口遇盜問知其爲涉也不
發其橐但索一詩以去涉詩曰風雨瀟瀟江上村
綠林豪客夜知聞相逢不用相迴避世上如今半
是君李彙征記彙征嘗遊閩粵至循州冒雨之韋
氏莊宿焉主人自稱野人韋思明年八十餘矣談
論淹洽連日夕不倦彙征不能屈也因及李涉詩
思明愀然變色曰僕少無賴睢恣江湖間結黨與

事剽劫後遇李博士得一詩因去跽迹羅浮易行
爲善士緬懷顧遇卽陸士衡之感戴若思李旣云
亡僕亦不復遊秦楚俛仰今昔不覺潛然持觴酌
之且出涉手翰觀之韋蓋皖口舟中之盜云

洞志李渤字濬之貞元中與兄涉隱居廬山白鹿

洞後徙嵩山元和初以右拾遺召不拜昌黎韓愈
遺書勸之渤始出家於東都每朝政有闕輒封章
上之尋遷右補闕歷考功員外郎長慶間出刺處
州改江州尋召還至諫議大夫卒贈禮部尙書渤
歷事三朝有直諫聲雖屢以言斥而耿介不挫

帖李渤隱廬山撫古聯德高蹈者楚接輿老萊子

黔婁先生烏陵子王仲豫梁鴻六人圖其像贊之

以自警漁隱叢話石洪温造李渤以處士盜虛名

韓文公雖與之遊然甚鄙薄之韓詩云水北山人

石洪温造得名聲去年去作幕下士水南山人温造又

繼往鞍馬僕從塞間里少室山人李渤索價高兩

以諫官徵不起彼皆刺口論世事有力未免遭驅

使夫山人也而刺口論事得聲名侈僕從索價高

遭驅使其於人賢不肖何如也其鄙薄之至矣

讀書洞中九人唐顏翊南唐伍喬江爲宋楊徽之劉

式劉元亨蒯鼈段鵠元黃翼

洞志顏翊真卿之後也少孤篤志先業又善詞翰
謹禮法弟子二十餘人從受經白鹿洞

洞志伍喬淮南人肄業白鹿洞學刻志進脩詩調
清苦**南唐書**廬山有僧夜夢一大星當空爛然甚
明傍有人指之曰此伍喬星也翌日行求得之因
厚資給之喬用是益得肆力於學喬嘗夜誦有人
掌自其牖入掌有二字曰讀易因遂學易其後果
以試畫八卦賦中第一人累官考功郎

山疏江爲梁侍中淹之後也與廬陵劉洞向師處

士陳貺讀書鹿洞二十餘年屢舉不第昇元中元
宗視學見其題壁詩大爲稱賞然卒無薦引者竟
不第洞善爲詩自謂得浪僊遺態云

楊徽之字仲猷建州浦城人也南唐時讀書白鹿
洞後仕宋爲諫議大夫遷翰林學士禮部侍郎太
宗嘗擇其詩十聯書於御屏景祐二年詔曰徽之
先帝宮僚其贈太子太師謚文莊

劉式字叔度清江人南唐時讀書白鹿洞試三傳
狀元及第宋平江南遠繫入京太祖素重其名以
爲鴻臚厯大理丞出監通州和豐監入判三司都

磨勘終刑部郎官**晦翁**白鹿洞所藏漢書歐熹既
爲劉子和作傳其子仁季致書以其先人所藏漢
書四十四通爲謝時白鹿書院新成因送使藏之
以備學者看讀子和五世祖磨勘府君式南唐時
讀書此洞後仕本朝有名太祖時其孫敞放皆爲
聞人今子和弟子澂之家尙藏其手抄孟子管子
書云是洞中日課也月日朱熹仲晦父記

洞志劉元亨字子嘉南康人讀書白鹿洞有操行

洞志蒯鼈宣城人家貧好學讀書白鹿洞性廉直
重然諾太平興國五年進士終殿中丞**南康志**鼈

與諸葛濤盧絳號廬山三友

洞志段鵠字正巳廬陵人宋端拱進士與瑯琊王儼建學李寅孟歸唐入廬山國學讀書十餘年並有時名

洞志黃翼字同民號節菴瀨之後也讀書白鹿洞至元間領鄉薦爲惠州學錄道源書院山長值兵亂棄官歸陳友諒據江州聘之不起

主洞五人南唐李善道朱弼宋明起與明胡居仁蔡宗充

洞志李善道南唐國子監九經昇元中始建學白

鹿洞以善道爲洞主

朱弼南唐時爲廬山國學助教剖析疑難學者所
依

山疏胡居仁者餘千人敬齋先生也初洪都諸當
道者使使以幣走新會迎白沙陳先生來主洞事
先生辭不至已乃聘敬齋敬齋旣入洞銳意倡明
聖賢之學且薦其徒有行義者陳大中輩三數人
與共事非常道意鬱鬱不得志無何謝病去敬齋
躬耕孝弟力行有聞君子以爲賢於吳康齋云
蔡宗充字希淵山陰人舉進士爲福建興化府學

教授踰年而歸因唐龍薦起爲南康府學教授主
白鹿洞復洞規變士風都御史王守仁遣五十金
俾剗公署會公署成乃以屬郡增置學田士林稱
之

與朱晦翁往來洞中二人劉清之陸九淵

洞志劉清之字子澄號靜春叔度五世孫也甘貧
力學舉進士終袁州守清之雅善晦翁嘗訪翁於
南康止白鹿洞有同遊三峽諸作

山疏陸子靜名九淵號象山金谿人朱文公守南
康時象山與其徒朱克家等至自金陵請書其兄

子壽墓銘因遂至鹿洞爲諸生講君子喻於義章
大略言學者當先辨志科舉得失因於所遇非以
爲君子小人之辨也而世以之相尙汨沒不能自
振雖誦詩書道仁義而所志則大謬矣甚者計官
爵之崇卑競廩祿之厚薄又安能謀國軫民無負
委任之意哉此其心非不各有所喻顧不在義耳
反覆數百言懇到明白切中學者隱微深錮之病
諸生聞之無不悚然動心有泣下者晦翁爲勒石

洞中

朱子門人講道洞中一十四人林擇之蔡沈黃幹呂

廬山新事卷一
三
炎呂燾胡泳李燔黃灝彭方周耜彭蠡馮椅張洽陳
宓

洞志林擇之字用中閩人從朱子遊最久朱晦翁
守南康時擇之來講學白鹿洞

蔡沈字仲默號九峰著尚書傳

黃幹字直卿號勉齋閩人也文公曰直卿志堅心
苦與之居大益人以其子妻之病革以深衣及所
著書與幹曰吾道在是矣幹後入廬山訪李燔陳
宓盤桓玉淵三峽間俛仰文公舊跡講乾坤二卦
於白鹿山南北之士皆來集焉

呂炎字德明呂燾字德昭建昌人兄弟五人同遊
文公之門炎與燾尤知名

胡泳字伯諒建昌人號桐栢先生

山院李燿字敬子號弘齋建昌縣人紹熙初登進
士授岳州教授教士以古文六藝改襄陽教授文
公之沒也學禁方嚴燿獨率同門往會葬後郡守
請爲白鹿書院堂長髦士雲集講學之盛他郡莫
比九江蔡念成稱燿心事如秋月卒贈直文華閣
謚文定

朱史黃灝字商伯號西坡都昌人舉進士教授隆

廬山縣志卷之七
興府知德化縣遷太常寺簿出知常州提舉本路
常平歲凶有旨倚閣夏稅灝請併閣秋苗不俟報
輒行之遂得臯削兩秩歸幅巾深衣騎驢往來匡
山中若素隱者朱文公守南康灝執弟子禮受業
文公沒黨禁方厲灝冒禁奔喪徘徊不忍去人皆
義之

洞志彭方字季正號強齋弱冠魁省闈累官兵部
尚書卒贈文華閣龍圖學士諡文正

周邦字直叟星子縣人博雅好古篤學工文爲洞
正勤於訓誨老而不倦嘗集朱子語錄

彭蠡字師範號梅坡都昌人仕至吏部尙書贈龍
圖學士

馮椅字奇之號厚齋都昌人登進士授德興尉調
江西運幹卒贈尙書奇之嘗家居授徒所著易詩
書語孟太極圖西銘輯說孝經章句喪禮小學孔
子傳續史記及詩文志錄合二百餘卷

宋史張治清江人少穎異從晦翁學自六經傳註
下逮諸史百家山經地志二氏之說靡所不讀嘉
定中中第授松滋尉改袁州司理參軍通判池州
以病請祠後袁甫提點江東刑獄請爲洞長擇諸

生好學者日與講說而汰其不率教者養士之田
乾沒於豪右者復之

宋史陳宓閩人丞相俊卿之子少嘗及晦翁之門
長師黃幹嘉定間知南康軍有政聲公暇卽造白
鹿洞與諸生講學今洞中石刻多其遺蹟改知南
劍州初延平書院以白鹿洞規教之嘗自言居官
宜如顏真卿居家宜如陶淵明而尤敬諸葛孔明
旣没家無餘財爲能蹈其言云

山疏朱子門人又有曹彥約簡甫周謨舜弼余潔
伯秀李輝晦叔劉賁煥文熊兆世卿其所居並近

鹿洞然不列洞祀彥約仕至兵部尙書兆號拙逸
朱晦翁嘗爲著拙逸說

賢而祀鹿洞者七人諸葛亮陶元亮周惇頤劉煥劉
恕陳瓘王禕

陳壽評亮之爲相國也撫百姓示儀軌約官職從
權制開誠心布公道盡忠益時者雖讐必賞犯法
怠慢者雖親必罰服罪輸情者雖重必釋游辭巧
飾者雖輕必戮善無微而不賞惡無纖而不貶庶
事精練物理其本循名責實虛僞不齒經載十二
年名不易軍旅屢與而赦不妄下

長史張裔曰公賞不遺遠罰不阿近爵不可以無功取刑不可以貴勢免此賢愚所以僉忘其身也
袁曄曰受六尺之孤攝一國之政事凡庸之君專權而不失禮行君事而國人不疑

樊建曰聞惡必改而不矜過賞罰之信足感神明
張南軒諸葛忠武侯傅亮用兵出入如賓踐敵境而芻蕘者不止師止如山進退如風出征之日天下震動而人心不憂雖數萬之衆而所興造若數十萬之功所至營壘井竈園溷藩籬障塞皆應繩墨一月之行去之如始至發教軍事文彩不豔過

於工甯而理事綜物公誠之心形於文墨夙興夜寐罰二十以上皆親省覽

廣漢張拭曰三代衰謀國者不復知正誼明道之貴三老董公獨得宏綱以告漢高帝惜高帝猶未盡其用也武侯乃能執其機而用之其言曰漢賊不兩立曰鞠躬盡瘁死而後已成敗利鈍非所能逆睹嗚呼此少康四十年經營宗祀卒以配天之本心也侯可謂有正大之體矣又曰侯恢復規模先務根本拳拳焉憂後主弗克負荷出師一表專言宮中府中一體且請親賢臣遠小人薦郭攸之

等使在左右侯之意深且遠矣又曰侯於學未足故於天下事不能徧該而一以貫之如昭烈譎取劉璋如立亡國之宗婦以爲后如昭烈之喪以日易月處之皆有所未盡非學之未至歟若侯者體大而未究於學者也

像贊維忠武侯識其大者仗義履仁卓然不捨方臥南陽若將終身三顧而起時哉屈伸難平者事不昧者幾大綱旣立萬目乃隨我奉天討不震不竦惟一其心而以時動噫侯此心萬世不泯遺像有嚴瞻者起敬

有功鹿洞十八人宋周述孫琛錢聞詩陳洽朱端章
黃桂劉傳漢元崔翼之陳炎酉熊升明翟溥福李齡
蘇葵陳銓李夢陽邵寶蔡清唐龍

洞志周述太平興國中知江州上言白鹿洞學徒
數百乞賜印本九經使習業之詔從其請命國子
監驛送至洞

田疏孫琛新淦人比部郎中父冕與王欽若同郡
欽若在相位冕久次館職不調晚得蘇州已及引
年卽謝事去卒葬洞後題曰孫史館之墓琛事具

沿革語中

洞志 錢聞詩字子言吳郡人淳熙辛丑代文公知南康軍有興建之功

洞志 陳洽知南康軍興學勸農建白鹿洞書院友善堂立天下名山大川橋亭

洞志 朱端章淳熙癸卯知南康軍置洞學田七百餘畝以贍四方之來學者

洞志 黃桂嘉定辛巳知南康軍置西源莊以爲洞學田

洞志 劉傳漢咸淳間知南康軍置白鹿洞貢士莊
洞志 崔翼之字鵬舉大德間爲南康守增置洞學

田百畝學士虞集記其事

洞志 陳炎酉至元間爲南康路總管繕修書院興學賑饑

洞志 熊升豐城人至元間爲星子令嘗與諸生講學鹿洞

洞志 翟溥福東莞人正統丙辰爲南康守時書院久燬惟枕流濯纓二橋在溥福至建殿堂齋舍凡若干楹書院由是復興翊道之功於鹿洞爲我明稱首

洞志 李齡潮陽人成化乙酉爲江西提學僉事考

廬山紳事卷四
課南康首訓白鹿洞學擇多士肄業其中

洞志 蘇葵字伯誠順德人江西提學僉事性剛介不苟合與中官董讓相構陷執諸生數百人號泣扶葵去尤於洞學有功

洞志 陳銓字秉衡永州人官御史弘治間按南康考學田多爲僧寺所據乃收寺市田九百畝於洞何喬新有記

洞志 李夢陽字獻吉慶陽人江西提學副使公餘詣書院講明經學記宗儒獨對釣臺六合諸亭大書刻字慮溪泉不可飲鑿井先賢祠後清查學田

作新志

洞志邵寶字國賢無錫人江西提學副使振起洞學諭學者立心之始幾莫先於誠僞辨莫先於義利欲學者暫輟進取以待學成然後出仕又教諸生習士相見禮至洞俛仰五老之勝作獨對亭自爲記

洞志蔡清字介夫江西提學副使學術醇正教人必極其蘊奧至洞開示諸生各盡其性士心丕變

洞志唐龍字虞佐江西巡按嘗上疏言白鹿洞書院雖古迹僅存然無專官主其事文室講堂鞠爲

灌莽無復昔時絃誦之盛夫南康府學去書院纔十五里勢可兼攝而興化府學教授蔡宗充學行足以楷範多士若使教授南康兼主鹿洞作養人才當必有可觀詔從之君子謂我本朝自開國以來未有以洞官上請者茲舉誠異數云

白鹿洞內有七姑廟烈女廟洞側有陳選墓

郡志七姑廟在勘書臺側**山疏**七姑者李渤之女也蓋旣死而鄉人祠祀之朱晦翁爲之書額今廢

王忠文公遊書院記過枕流橋從烈女廟後登北岡**山疏**烈女不知誰氏或曰卽七姑也然郡乘不

載廟今廢

郡志宋陳選字公順博學敦行登進士仕爲節度推官蘄州守俱著政績以太子賓客致仕卒

藝文

呂祖謙白鹿洞書院記淳熙六年南康軍秋雨不時高仰之田告病郡守新安朱侯熹行旣陂塘並廬山而東得白鹿書院廢址慨然顧其僚曰是蓋唐李渤之隱居而太宗皇帝驛送九經俾生徒肄業之地也書院初於南唐其事至鮮我太宗於迅掃區宇日不暇給之際獎勸封植如恐不及規模

遠矣中興五十年釋老之宮圯於寇戎者斧斤之
聲相聞各復其初獨此地委榛莽過者太息庸非
吾徒之耻哉郡雖貧薄顧不能築室數楹上以宣
布本朝崇建人文之大旨下以續先賢之風聲於
方來乎迺屬軍學教授楊君太法星子縣令王君
仲傑董其事又以書命祖謙竊記其成祖謙竊嘗
聞之諸公長者國初斯民新脫五季鋒鏑之厄學
者尙寡海內向平文風日起儒生往往依山林卽
閑曠以講授大率多至數十百人嵩陽嶽麓睢陽
及是洞爲尤著天下所謂四書院者也祖宗尊右

儒術分之官書命之祿秩賜之扁榜所以寵綏之
者甚備當是時士皆尙質實下新奇敦行義而不
偷守訓詁而不鑿雖學問之淵源統紀或未深究
然甘受和白受采既有進德之地矣慶厯嘉祐之
間豪傑並出講治益精至於河南程氏橫渠張氏
相與倡明正學然後三代孔孟之教始終條理於
是乎可攷熙寧初明道先生在朝建白學制教養
考察賓興之法綱條甚悉不幸王氏之學方興其
議遂格有志之士未嘗不歎息於斯焉建炎再造
典刑文獻寢還舊規格論緒言稍出於毀棄翦滅

之餘晚進小生驟聞其語不知親師取友以講求
用力之實躡等凌節忽近慕遠未能窺程張之門
庭而先有王氏高自聖賢之病如是洞之所傳道
羨者或鮮矣然則書院之復豈苟云哉此邦之士
盍相與緝先儒淳固慤實之餘風復大學離經辨
志之始教由博而約自下而高以答揚熙寧開迪
樂育之大德則於賢侯之勸學斯無負矣至於考
方志紀人物亦有士者所當謹若李濬之之遺跡
固不得而略也侯於是役重民之勞賦功以狹率
損其舊十七八力不足而意有餘矣興廢始末見

於當塗郭祥正所記者皆不書

朱晦翁白鹿洞賦曰誠明之兩進抑敬義其偕立
允莘摯之所懷謹巷顏之攸執虞伯生跋集嘗泛
彭蠡登匡廬升斯堂三復斯文於所謂誠明兩進
敬義偕立凜然有遲莫無及之歎今夫荒澗寂寞
之濱朝誦暮絃豈無其人哉安知其不與予同此
感也輯而錄之家傳人誦則不必皆至白鹿洞而
已盡之矣

王禕遊白鹿洞記去郡北行十五里至羅漢寺路
岐而二其西入棲賢谷東則至白鹿洞也比至兩

山勢回合當其合處澗水出焉過澗逾小嶺嶺有
缺若關門然入關路循澗北並山轉澗南皆良田
也約二三里乃至書院其址當五老峰下燬已十
五年樹生瓦礫間大且數圍有石橋曰濯纓其左
又有石橋曰枕流過枕流從烈女廟登北岡岡上
有大杉木六七百年物也今伐爲御殿木矣書院
所存獨此二橋從卒指殿堂齋舍及風泉雲壑樓
故處以告甚歷歷慨想昔日規制不可復見矣或
云從此右折東南逾重岡行二三里乃至白鹿洞
從洞後右折陟嶺乃可到尋真觀望水簾也不果

往徘徊久之而還

井泉滂若水四勿總歲心含天靈灑氣之精與地
廣大與天高明惟精惟靈貫通百體非禮一念乾
知大始事雖惟四勿忘則一如精中軍八面却敵
精靈之至是謂之幾顏復不遠百世之師聖遠言
湮多岐支離一貫四勿毋二爾思

朱晦翁尋白鹿洞故址愛其幽邃議復興建感歎

作清冷寒澗水窈窕青山阿昔賢有幽尙眷言此
婆娑事往今幾時高賢絕來過學館缺廢址鳴絃
息遺歌我來勸相餘杖策舉緣蘿謀野欣有獲披

圖知匪訛永懷當年盛莘莘矜佩多博約感明恩
涵濡熙泰和淒涼忽荒榛俯仰驚瀾波發教見綱
紀喟然心靡他伐木循陰岡結屋依陽坡一朝謝
塵濁歸哉碩人過次下學書落成白鹿佳句重營
舊館喜初成要其羣賢聽鹿鳴三爵何妨奠蘋藻
一編詎敢議明誠深源定自閒中得妙用元從樂
處生莫問無窮菴外事此心聊與此山盟

李夢陽白鹿洞別諸生詩東南自有匡廬山遂與

天地增藩衛山根插入彭蠡湖崢嶸背殺三江勢
地因人勝古有語於千萬物隨興廢學館林宮客

不棲千巖萬壑堪流涕
文采昔賢今尙存
講堂寂寞對松門
松門桂華秋月圓
柱杖高尋萬古源
梅嶺古色照石鏡
扶桑丹霞迎我軒
絕頂坐歌霜月淨
石潭洗足芝草繁
更有冠者五六人
峭崖窮嶂同攀攀
草行有時間過虎
旦暮時復啼清猿
我今胡爲公務牽
蟋蟀在戶難久延
出山車馬走相送
落日遂上鄱陽船
生徒綵戀集涯澣
孤帆月照仍留連
情深過厚亦其禮
謫薄竊愧勞諸賢
明朝伐鼓凌浩蕩
五峰雙劍生秋煙

吳遵白鹿洞示諸生詩五峰高出五雲端
精舍晴

開翠鬱盤百世流風瞻俎豆兩間元氣重衣冠
岩頭草色春將遍樹裏嵐光晝亦寒薄暮詠歸情未
已尙餘幽夢繞清湍

何遷白鹿洞書院詩白鹿山中放鶴遊匡廬風日
古尼丘三泉倒吸長江水五老橫飛彭蠡秋

孫應鰲重遊白鹿洞歌白雲初開瀑布飛逸客復
來登翠微山影照耀轉日暉忽忽滿空煙雨霏穿
林度岸苔蘚腓野花襲人香氣馥洞口波長沒釣
磯石脉泉溜衝荆扉愛景步涉忘曲碕隨到杯酒
相與揮氣志瀟洒偕音徽盤桓送日未云幾羣峰

散紫晷色希不覺明月乍沾衣濯出混沌流光輝
移陰曜彩星宿稀嘯歌逍遙言旋歸心慮澹然理
無違世事浩渺何是非回首陳迹莫歔歔古來曾
點得所依不見舞雩與沿沂六極放懷且忘機松
風悠揚露漸晞

九江子朱司藩白鹿洞詩 澗水觸石鏘鳴璆桂樹

叢生山之幽山南初熹到白鹿水北恰當逢女牛
入耳蝸蟾休太沸會心龍護自知求回看五老好
容色瀟洒江湖遡早秋

題孤亭 孤亭縹緲四無鄰今古匡

廬望裏春俯仰乾坤須著此主張風月更何人洗
心賴境終非靜避俗耽山亦是塵未喪斯文吾黨
在莫交虛度電光身

深巖紫洞韻詩

欲向茲峰早卜鄰開花鳴鳥八千

春採芝常想寬閑野避世應歸磊落人忍使白雲
依水石翻憐黃髮老風塵玄珠象罔何由得姑射
山中信有身

翰林王希烈過白鹿洞詩

偶繫扁舟湖水濱穿雲

躡屐破秋旻丹霞迥隔紅塵界瑤草長留玉洞春
自去眞儒誰地主纔登蓬島卽天人朋來亭上開

新酌五老參前成主賓

九江判方子翕春晚過白鹿洞詩擁旌春暮入山
扉白鹿收鳴古洞微卽座生香芳樹合滿亭空翠
夕陽歸雲埋脩竹侵書案風送飛花上客衣吾道
本來無物相眼前活潑是真機

詹仰庇過白鹿洞詩白鹿幽居喜共臨青山到處
好相尋天開仙掌雲爲色澗落珠簾雨作音四壁
圖書寒竹潤千年廟宇瑞煙深我來猶負匡君約
獨對孤亭繫此心

桑喬生日羅輅洞榜三事云洞學今爲遊觀之所官

司往者皆多擁騶從張氣勢下吏畏罪盛供具事奔走以自容所耗民財甚多民貧不能祇承一也洞學殿堂齋祠館舍庖廩靡不具備有司者以時修飭之可以不廢頃者諸司務出新意建亭榭以自標置事在上司片言耳而耗財勞民二也頃者洞田賣遠買近紛更混淆易生弊端而洞主兼督租事出納繁雜亂心奪業奸民玩愒威令不能行又建昌縣民以別府地遠多逋負租不時輸三也呂柟新闢白鹿洞記曰奈何費田屋以業遊觀之徒噫有是哉

廬山紀事卷七終

廬山紀事卷八

廣陵 桑喬 子木

山南自五老峰東北行至吳章山

華嚴寺華蓋石

五老峰下獅子峰東有華嚴寺

南康志華嚴寺舊名般若院在九疊屏下宋僧規
圓建舊志在九疊屏南**山疏**在獅子峰南梢東與

折桂間一山

獅子峰東之水逕華嚴寺出楊梅橋

楊梅橋在華嚴寺東

華嚴寺東南有華蓋石一名萬壽無疆石

山疏華蓋石在石牛山東南二里所與楊梅橋相

值上大下小其上圍三數丈戴以一榦亭亭如張

蓋故謂之華蓋朱晦菴詩云祇應來自太微垣

宋晦翁題志朱仲晦父與王之才揚子直蔡季通

胡子先鄧缺老胡仲開同飲此石望五老峰瀆熙

七年上章困敦孟缺癸酉缺書

石劖風雩二大字亦晦翁書

朱文公熹華蓋石詩醉扶藜杖少盤桓四遶烟蘿

手自捫此石至今無處問祇應來自太微垣

周頤聖壽無疆頌廬山草茅臣周頤撰并書序曰

臣聞大德必得其位必得其祿必得其名必得其壽今皇天以是全美眷于我有宋恭惟光堯壽聖憲天體道性仁誠德經武緯文紹業興統明謨聖烈太上皇帝道運無積功成不居蕩蕩巍巍與天同造耆齡延長振古未有皇帝卽位之二十四年申命有司討論典禮十二月二日加奉上尊號冊寶越明年元日率羣臣詣德壽宮上壽肆推慶澤用大賚于家邦於戲盛矣哉臣幸際亨嘉身同鼓舞宜有歸報之辭殫厥形容之美勒諸名嶽震耀

無窮謹拜手稽首而作是頌頌曰聖皇丕承駿命
誕膺紹開中興六龍御天握符總權三十六年尺
土一民涵和養醇如海如春神器宅中付以至公
退養淵冲揖遜寥寥惟我熙朝視古陶姚功隆德
兼帝心日嚴養以色占龍樓燕閒問安旣還喜見
天顏顯號重都玉鏤金塗三騰嵩呼王春履端慶
典隆寬聳爾聽觀晨光初霞清蹕翠華肅無敢譁
簫韶九成合奏在庭千官列星皇帝奉觴以介鴻
龐來崇來降雨露恩深曠儀自今萬國謳吟小臣
何知敢無祝辭百拜申之願聖人壽八千歲周爲

春爲秋願聖人壽垂佑至尊廓清乾坤願聖人壽
至尊躬迎玩意神京南斗之傍五老昂昂祥煙壽
光作頌維何蒼崖可磨書刊嵯峨聖壽日躋茲峰
與齊億萬年兮淳熙十四年秋八月刻石五老峰
前奉議郎權知江州軍州兼管內勸農事借紫臣
王旣朝請郎權發遣南康軍兼管內勸農事賜緋

臣葉鋌

龍雲菴

華嚴寺東北有龍雲菴

南康志 永福院舊名龍雲菴在凌霄峰下僧岩頭

巖建

山疏寺傍山而居與九疊谷口相距間去聲一山其

西有龍雲洞其南有澗水不知名

寺側有雨花洞在凌霄峰下觀山尋真觀

龍雲菴東北為觀山

山疏觀山在五老峰東以尋真觀名山峻削其半

有白龍潭舊志有金蛇時時出潭中禱雨輒應舊

有惠澤龍王廟今廢其水曰尋真源

三疊泉水出壑並觀山而下與龍雲菴南澗水合逕

石牛山為相辭澗

觀山之下有尋真觀

尋真觀者女真蔡尋真之所居也

真僊通鑑蔡尋真者侍郎蔡某女也李騰空者宰相李林甫女也幼並超異生富貴而不染貞元中同入廬山蔡居詠真洞天九疊屏南李居九疊屏北凌雲峰下並以丹藥符籙救人疾苦三元八節會于詠真洞以相師資講道九江守許渾以狀聞昭德皇后賜金幣闢土田已而蛻去門人收簪簡瘞于舊居鄉俗歲時祀之不絕其後昭德崩許渾入朝因請賜觀額以昭追奉詔以詠真洞爲尋真

觀騰空所居爲昭德觀**山疏**後燬觀前石橋亦崩
圯詠真洞與尋真瘞處不知所在

舊志漢武帝過九江築室屏風疊臨相思澗曰羽
章館**山疏**非也史記漢武帝元鼎中越欲與漢用
戰船逐乃大修昆明池以習水戰列觀環之有館
曰豫章館言將出師豫章也非廬山事且漢武時
烏有相思澗之名哉

夷堅志陳東靖康中飲于京師酒樓有倡打坐而
歌者東不之顧乃去倚欄而歌望江南音調清越
東不覺傾聽視其衣雖故弊然時時揭衣爬搔微

露其膚瑩潔如雪乃復呼使前再歌之其詞曰闌
干曲紅颺繡簾旌花嫩不禁纖手捻被風吹去意
還驚眉黛蹙山青鏗鐵板間引步虛聲塵世無人
知此曲却騎黃鶴上瑤京露冷月華清問詞孰爲
之曰上清蔡真人也言訖得數錢卽下樓去亟使
追之已失矣**李定記**宣和中太學士人會飲任氏
酒樓有婦人妝飾甚古而無左臂執鐵拍板唱云
云曰上清蔡夫人法駕導引曲也妾本唐人五季
之亂左手爲賊所斷今遊人間因求飲與之杯飲
出門忽不見**山疏**上清真人不知何所指紀遊集

錄之尋真觀曰卽蔡尋真也未知是否宋時京師歌者不招而前謂之打坐

唐呂溫恭同夏日題尋真觀李寬中秀才書院詩
閑院開軒笑語闌江山併入一壺寬微風但覺杉香滿烈日方知竹氣寒披卷最宜生白室吟詩好就步虛壇願君此地攻文字如煉僊家九轉丹

虛白館

舊志虛白館在觀山下今廢

紀遊集前有雙澗流旁有獅子峰後有靈龜峰虎嘯崖麻姑崖列于四隅別是一壺天也

觀山之北爲麻姑崖崖上爲大鵬峰

山疏麻姑崖在九疊谷東北崖巉削童赤壁立數十百仞其下有普菴洞

舊名鐵壁峰半崖有石榻子在麻姑崖東南懸崖上皆鑿石爲之方目疏楞如出鬼工去地數十丈傍有誌刻高不可辨

旁有毘盧峰其下有玉川門門內有鐵壁精舍

山疏玉川門者當三疊水口其兩崖壁立萬仞澗從中關路行處兩石相磕中穿一竇遊者低首而進其石色白如玉故名

鷹背峰瑞雲崖九疊屏

五老峰東北爲鷹背峰瑞雲崖

南康志鷹背峰在五老峰側九疊屏上

山疏瑞雲崖在鷹背峰下通五老峰前皆是爲九疊雲峰

舊志九疊屏在五老峰東北

山疏九疊雲屏者亦謂之屏風疊亦謂之九奇峰
山繁九疊如屏也在麻姑崖西北

參議孫應鰲雲錦屏詩日出烟分道氤氳亂眼前
屏開天上錦花發鏡中蓮

疊屏之上有三石梁

紀遊集九疊屏有三石梁其長數丈其廣不盈尺橫絕青冥人罕能至

述異記咸康中江州刺史庾亮迎吳猛至州猛將弟子登山遊觀過梁見一老人坐桂樹下以玉杯盛甘露與猛猛飲其半以其半飲諸弟子又進至一處見玉宇金房輝彩眩目多珍寶玉器有數人與猛共言若舊識爲猛設玉膏猛弟子竊一寶欲回示世人梁卽化纖細如指猛使還寶梁復如舊

山疏今九疊屏巔五老峰上與大月山皆人跡所

廬山紀事卷八
十一
到並無所謂三石梁者詳具開先寺語中

詠真洞天

紀遊集五老峰上有詠真洞天

洞天靈跡記鄂州劉德本避亂廬山遇鹿裘道者與俱至五老峰下深礪中有大石門正闕一老人扶策倚門立見德本卽邀與俱入乃大石洞也洞中別有天地風日和煦花樹芳蔚夔異人境行數里有大宮殿金碧煥爛呵衛嚴甚榜曰紫元景曜之門老人曰此九天使者所治也德本欲求見使者老人不可因復出門逡巡失老人及道士所在

山疏據此則詠真洞天乃靈境化見非五老峰上
疊屏之下有九疊谷

山疏九疊谷卽三疊泉壑也谷兩崖峭壁數百千
丈怪石錯列塞途廬阜之谷此最險矣

南康志識真亭在三疊泉谷中朱晦翁興復鹿洞
時嘗往來谷中故建今廢

河岳山人遊廬山記九疊谷山中人言遊者往往
值風雨昔有人遇物如犬而大長頸而白癭逐其
人且將噬之疾走乃免

三疊泉

廬山紀事卷八
九疊谷內有三疊泉

山疏三疊泉者亦謂之三級泉亦謂之水簾泉泉下注磐石三疊而後至地也在五老峰背

凡欲適三疊泉者其始並觀山下澗南行行浸至谷口則逾澗北行行三數里當人所行道有小洞如門可通人行俗謂之關門石劉世揚謂之玉川門其北壁有世揚玉川門三大字李夢陽謂之白鹿洞**夢陽遊廬山記**入壑行並澗路石漸巉崑數里至白鹿洞此澗之鎖口也羣峰夾澗峭立巨石怒撐交加澗口水湍激石闕旁有罅人偃僂穿之

過洞復並澗轉北行數里至水簾泉然路過澗愈
險絕行徑鳥道石罅間人跡罕至矣

三疊之水出自大月山之東北由五老背而東注
焉凡廬山之泉多循崖而瀉乃三疊泉不循崖瀉
由五峰北崖口懸注大盤石上裊裊如垂練既激
於石則推碎散落蒙密紛紜如雨如霧噴灑二級
大磐石上會爲洪流下注龍潭轟轟萬人鼓也蒼
崖峭削中豁如門有石橫亘龍潭之昏如闕謂之
水簾洞紀遊集上級如飄雲拖練中級如碎玉摧
冰下級如玉龍走潭散珠噴雪真天下絕景非谷

簾瀑布所可方也李夢陽遊廬山記勢如遊龍飛
虹架空擊霆雪翻谷鳴真廬山第一觀

石刻宋嘉定及元呂師中刻皆漫漶不可識又潭

中石柱刻宋紹熙缺年錄月太守史文卿至此又

天泉二大字又北崖劉谷簾泉三大字又三疊泉
源出大月山下九字又三疊泉上有刻高不可辨

朱晦翁與黃商伯書新泉之勝聞之爽然自失安
得復理杖履扶此病軀一至其下仰觀俯濯如昔
年時或有善畫者得爲使畫以來幸甚五老新瀑
曾往觀否夢寐不忘也新泉圖子與和成旣爲定

藁必已能盡寫其佳處只就覓此草本不必重摹
俗工或能反敗人意也自聞此泉新出恨未能一
遊其下以快心目濺雷噴雪發夢寐也瀑圖韻譜
近方得之圖張屋壁坐起對之恨不能到其下也
又與楊伯起書白鹿舊遊恍然夢寐但聞五老峰
下新泉三疊頗爲奇勝計此生無由得至其下嘗
托黃商伯陳和成摹以來摩娑素墨徒以慨歎
元趙孟頫水簾泉詩飛泉如玉簾直下數千尺新
月如簾鉤遙遙掛空碧

禮部文矩子方九疊屏詩吾聞匡山雲錦九疊之

勝神所栖界天絕壁雲爲梯鳥飛摩霄注壑不可
到上有泰始之積雪下有歷劫之冰澌靈岫僊崑
虎豹遠綠樹杳杳青猿啼蔡元君騰空子今何處
桃花石室逼崑戶捫箕歷軫欲上去轉迷中有神
君指僊路石梁浮空來浩然啟天關手捫五老頂
足躡香爐烟但見飛霞笑電搖光九道疊雲錦天
河中斷摧鐵山鐵山河巖窠素浪決出崑崙巔懸
流一瀉數千仞跳珠迸出與石恣鬪却上倒作雪
濤翻長松吹香灑晴霧玉泓直下含清寒嗚呼安
得南箕爲杯此水爲酒手携雲旗喚王母持獻吾

君千萬壽暢皇風包九有七十二君同不朽却容
三十六帝有外臣盡乞南山種三秀清水黃塵一
回首盧君此意今知否

參議孫應鑿水簾泉詩映月星平散穿雲玉亂披
不妨人到少瀑布足稱奇

桑喬生日三疊泉奇勝爲廬山第一李太白朱晦翁
皆未之見非遺之也其時泉尙隱人不之知也朱子
解郡之後有樵者昉見而傳之朱子書所云新瀑是
已宋劉過三級泉歌五老峰北嵯峨巔龍泉三疊來
自天只疑開闢便有此山靈榛蔽經幾年一朝何事

失扁鑰樵者得之人共傳欲往從之不憚遠幽谿絕
壑難摹緣聞者或未信故述之三疊泉下有鈴岡嶺
山疏鈴岡嶺卽三疊谷北崖東人所謂大山是也
其下有觀音岩觀音洞

僊人磨在嶺上二圓石相積疊如磨

嶺之南麓有大石如亭松蘿蒙密天風吹之開闔
動搖谷響應之若有人居莫知爲何所也

舊志觀音洞深進半里許

洞旁有竹林寺遺跡

石劖竹影疑踪四大字翰林鄧旭書

其洞上山嶙峋東走爲大梁津

山疏大嶺過脉下結青山其大梁津長數十丈廣不盈尺四旁皆山下臨無地形如大梁通五峰東道故名大梁津

石牛山相辭澗

觀山之南爲石牛山

山疏石牛山鹿洞志謂之鬪牛山紀遊集謂之臥牛山相傳女真蔡尋真李騰空所憇以奕棋處也
山上有棋盤石

其南有相辭澗

廬山志卷之八
三

山疏初唐李林甫女師事蔡尋真與俱入廬山學
三洞法以丹藥符籙治人疾苦其後術成李去北
居昭德觀蔡乃留居九疊屏下別于茲澗之上故
曰相辭澗今人謂之相思澗舊有相思橋今崩圯
三疊之水逕石牛山出爲相辭澗
相辭澗之墟有元集虛隱居

山疏唐元集虛河南人貞元元和間避地來居廬
山相辭澗白樂天在江州時嘗與往來隱居今不
知處**白樂天題元八谿居詩**溪嵐漠漠樹重重水
檻山窗次第逢晚葉尙開紅躑躅秋房初結白芙蓉

蓉聲來枕上千年鶴影落杯中五老峰更愧殷勤
留客意魚鮮飯細酒香濃又雨夜贈元十八詩卑
濕沙頭宅連陰雨夜天共聽簷溜滴心事兩茫然
把酒循環飲移床曲尺眠莫言非故舊相識已三
年山疏樂天又有題元十八溪亭詩二元皆居廬
山下不知孰爲集虛

長嶺迴風寺青山

石牛山迤東傍湖有山獨峙是爲長嶺其下有迴風
寺

南康志迴風寺在迴風嘴去郡東北二十六里宋

廬山紀事卷八
僧慧益建其西有馬頰湖

長嶺東北有山是爲青山

山疏青山在大廣湖東並湖湖漲則在水中央

其上有桃花菴菴多碧桃花故名

青山東北有白石巖又東北乃至大孤山

香山佛佑菴登雲寺固城山石子山

石牛山東北有山曰香山其上舊多香草其下有佛佑菴

山疏佛佑菴在香山下稍西去石牛三數里景泰

中僧弘贊建

菴西南山有洞如石屋洞前有九猪澗龍王井

山疏龍王井在菴側九猪澗俗呼爲野猪窪在菴南其側有石屋菴之東北有古佛菴

女真潭在菴東北女真不知何神鄉人皆迎祀以祈雨澤淨惠主丁僊佛佑主女真

女真潭水九猪澗水合流南入大廣湖

佛佑菴東北有登雲寺

山疏登雲寺在香山南僧登雲之所建也登雲不知何時人亦不詳其行履寺後有登雲石其生平所宴坐處也相傳以爲昔有僊真於此飛昇云菴

後廢我明景泰中僧月朗重建

徐道人者天池所祀四僊之一也嘗脩煉於登雲
至今祀之以爲祖焉

登雲之水逕固城山西南流與女真潭水會

香山之東南有山三日固城山曰石子山曰茶山嶺

四疏固城山在香山南登雲寺口

石子山在固城山東南其東卽大廣湖

茶山嶺在石子山北其東爲穀山湖

卓嶺

香山之東北其相比者爲卓嶺

山疏嶺夷曠其巔有田三數十畝其西恩德諸山
迅吹時發禾善敗歲恒不穫

卓嶺之東有昭德觀

山疏昭德觀唐女真李騰空之居也今廢觀有古
竹今不存

宋無爲子楊傑昭德觀碑騰空本公卿家初從蔡
女遊咸有道術以丹藥符籙救人疾苦三元八節
會於詠真洞天九江太守柳萇以狀聞今疊屏下
大溪噴激白雲蒼崖物象勝處卽騰空所居也及
解脫弟子收簪簡痊于舊居唐昭德皇后常施金

幣闢土田因建昭德觀而名其溪曰昭德源皇佑
中賜名延真

李太白贈李騰空詩多君相門女學道愛神仙素
手掬青靄羅衣躡紫煙一往屏風疊乘鸞著玉鞭
又送內尋李騰空詩君尋騰空去應到碧山家水
春雲母碓風掃石楠花若戀山居好相邀弄紫霞
朱晦翁昭德源詩景幽人跡少惟有紫源長水接
天池綠花分繡谷香僧閒多老大寺古半荒涼却
怪尋山客何由到上方

屋脊嶺女兒城麥社山大麥社劉家砦山大洞

山恩德嶺大山馬英山淨慧寺張家山大城寺
卓嶺之北有大谷入谷西南行則至牯牛嶺當嶺之
東南有山曰屋脊嶺兩山之間曰女兒城

四疏屋脊嶺者牯牛嶺之支也嶺巉削石角立巒
巒然如攢劍戟劉世揚名之曰廬山最高處

女兒城在牯牛嶺東元末人所據以避兵處也兩
山迴合東豁如門

篳子林在女兒城東地多叢篠可用爲篳

屋脊嶺東北有山曰麥社山其下有大麥社中有仁
王寺上菴中菴下菴

廬山紀事卷八
二
山疏大麥社元人避兵時所種麥處也

上菴下菴俱在大麥社舊有仁王寺今廢

大麥社東北有劉家砦山

山疏劉家砦山在大麥社北昔人於此結砦避兵故以名山劉氏蓋其長也有洞口劉家砦洞亦避兵時所嘗居今遺骸刀劍槃盂狼籍其中又多伏翼羣飛掠人炬不得爇人無敢入者。

王家坡在劉家砦山下亦故砦地也

大麥社之西南爲海螺城山形如海螺堆疊故名

劉家砦之北卽蓮花三峰自大麥社北望劉家砦

山外有山縹緲微露其巔者雞公石也

大麥社南有大澗山其水曰大澗曰磨刀澗

山疏大澗山在大澗南山巉削骨立鬢鬢然如屋脊嶺大澗出大麥社山南破中循山趾東北行磨刀澗出大澗山南山破中水涓涓流微泉也東北行與大澗水合

鷓子石在磨刀澗西石甚雄偉

大麥社東有山曰恩德嶺其上有朝陽洞

山疏恩德嶺在大麥社東而橫出隄其下流嶺高峻道險阨大澗水與磨刀澗水合而走其下傾崖

百尋徑不盈咫舊有朝陽菴今廢有洞曰朝陽洞
山疏大山卽鈴岡嶺之末也在香山北極高高乃
倍於恩德嶺

南康舊志云凌霄峰在昭德觀北上有詠真洞天
山疏真僊通鑑明言咏真洞天在九疊屏南今何
以云在昭德北且昭德之北卽張家山破山諸處
烏有所謂凌霄者哉真僊通鑑曰騰空居九疊屏
北凌雲峰下今大山去昭德不數里疑卽所謂凌
雲峰云

恩德之南爲索子澗出大山山破中無泉源以雨

暘爲盈涸山硤幽邃饒竹樹日月光所罕及精靈萃之人暮樵有死者

恩德之東北有小山曰馬英山其僧舍曰淨慧寺

南康志淨慧寺卽宋昌院建于宋初江州守李逢宗爲之請額祥符中改今名天順初僧繼成重建

山疏寺爲天池東道

丁僊井在淨慧寺西丁僊不知何許人相傳蓋牧豎也戲爲巫引繩自絞卽死死而能神靈鄉人迎祀之以祈雨澤多應或家祀之以爲福神而祈福云其井深不可測

舊志紀遊集大士泉有二穴上水下涸蓋瀾洑也

爾雅泉一見一否爲澱一有水一無水爲瀾洑

山疏索子澗水逕香山出恩德嶺東與大澗水磨

刀澗水浮橋山水合而出淨慧寺

馬英山東北爲張家山其下有大成寺

山疏張家山在淨慧寺側數峰連亘宋張季膺之所居也季膺事無可考

南康志大成寺在張家山南平陸宋乾道中僧雪峰建

山疏大成之墟其山如城其地曰高壠

大成之水南行與淨慧水合逕苙山入大廣湖

浮橋山浮橋菴佛頭峰大雄菴

大成之東北有浮橋菴

山疏浮橋山當劉家砦東北極高峻然無名以浮橋菴名

浮橋菴在浮橋山半正統中僧德觀建澗險邃道紆伐木爲橋以濟不通故名菴後有花果園前有馬尾水東北有牛角衝

浮橋之東北爲佛頭峰其下有睡龍潭其僧舍曰大

雄菴

四志大雄菴唐僧尋山建兵廢正統中僧惠嚴重
建**四疏**佛頭峰在牛角衝北大雄菴在牛角衝東
玉巒峰慧日寺破山

佛頭之東北爲玉巒峰其下有僊居洞

四疏玉巒峰者雙劍峰之南也峭峻如削碧玉

玉巒峰下峰巒迴合中豁一區岌業靖深謂之僊
居洞白龜池在洞內今涸

宋錢聞詩仙居洞詩僊客神人幾度行環山岌業
似重城有門不掩寒溪月終日水流無盡聲

其僧舍曰慧日寺

山疏慧日寺在僊居洞宋僧如義建兵廢天順間僧慧廣重建

慧日之僧二曰文雅禪師曰明禪師

慧日寺後有水硯衝其北至九峰菴

玉巒峰前有山曰破山

四疏山石骨立巉削如裂

僊居洞水東南流慧日之水逕破山南流共入穀山湖

鷹觜崖智林寺雲頭菴

玉巒峰東北有鷹觜崖青牛洞

山疏鷹觜崖在僊居洞東北火山之南也崖高峻

其顛卽太平宮道士劉虛谷所坐逝處

青牛洞在鷹觜崖西卽爲青牛谷

其僧舍曰智林寺雲頭菴

南康志智林寺卽慈雲院在青牛洞前晉僧齊法

建天順初僧惠宗重建

山疏雲頭菴在智林寺西南今漫廢

智林寺水東南流與慧日之水會

桑喬生曰智林巨刹也往南宋時多名僧與寶峰萬

杉埒稱有音首坐者方大慧杲未竄衡陽時常正辭

箴其闕失既竄又遺書勉以自盡其所相與宛乎聖
賢道德禮義之風嗟夫孰謂學異端者能爾耶又曰
唐宋時叢林之長皆司府所擇授其人尊其品式嚴
僧行敬畏其教易行今廬山惟東林天池二寺住持
部授直主寺事迎送上官非大禪德人不宗信近亦
不聞有部授者而諸他寺皆僧自住種浸以廢圯矣

廬山紀事卷八終